

Herremättli-Clique 1989

Sujet:

Das Resslertheater kunnt is spanisch vor

Ussländer sinn mir z'Basel gwehnt.
Mer haige z'vyl, wird mänggmol gschteht.
No Schwoobe, Tirgge und Iraner
syt kurzem au no Lipizzaner,
wo kemme us em färne Wien
und by uns gaschtiere dien.
Fir d'Basler sigg's e grossi Ehr,
si haige Fraid und schätze's sehr.
Numme interessiert uns, bitterscheen,
worum die Ressler Wien verlehnt
und frooge im ene Interview
"Pfärdli, was mainsch Du drzue?"
Aes sait dr Grund: "Mir finde's glatt",
Eeschtrycher-Witz haig's langsam satt.
Drum, duet's lyyslig uns verzelle,
well's s'Asylgsuech z'Basel schtelle.
Bischaidehait, das sigg sy Art,
e bitzeli Brot, ob waich, ob hart,
au Hafer bruch äs numme wenig
und wurd sich fyyle wie ne Keenig.
Denn miessti äs jo au nimm grampfe.
Als Asylant griegsch z'dringge, z'mampfe.
"Was maint Dy Frau?", hänn mir denn gfroggt.
"Oh, Pfärdli, het die Froog Di bloggt?"
Aes foht a hyyle, furchbaar, schuurig,
Drääne fliesse, s'isch ganz druurig.
D'Erklärig isch denn schnäll baraad:
"Als Lipizzaner läbsch im Zölibat!
s'duet kai wyyblig Waase logge,
au die nit, wo uff dr ummehogge;
s'sinn alles numme "Heererytter"."
Aes het kai Frau, oh, das isch bitter!
Do kunnt is dr Bundesroot in Sinn,
joorelang het's numme Männer dinn,

bis ändlig und no vylem Wuurge
e Wyybli het derfe yneschluurpe.
Das Bethli bringt dr wyblig Charme,
numme ab ihrem Maa kehrt's uns dr Darm!
Mit Persil griegt dä Monete-Chluuber
die dräggigscht Dollar-Note sauber.
Schlussändlig het halt iber d'Klinge
's Fraueli denn miesse springe,
will's z'spoot gmerggt het gha,
was är so driibt, sy Hanslimaa.
So Skandääl im Schwyzerland
findet s'Ressli allerhand.
Wenn die do soo Sache driibe
will's lieber Eeschtrycher bliibe.
Draabt dervo zem Räscht vo dr Härde,
wo zer Vorstellig baraad gmacht wärde.
Kapriole und Levade
macht die Ressler-Kavalkade
in der volle Joggeli-Halle,
Walzer vom Strauss dur d'Halle schalle.
No vier Mool isch es denn verby.
Die Wiener Gescht verschwinde gly.
Uns bliibe d'Schwoobe, d'Tirgge und d'Iraner,
aber kaine Lipizzaner.

D'Ladärne-Uusstellig ka vom Määntig znacht, am
13. Hornig, bis am Mittwuchen am Morge, am 15. Hornig,
bsuecht wärde. Si findet, je no Wätter, in dr Muba oder uff
em Minschterblatz statt. Uuskunft git's Delifon 183 ab
Fasnachtsmäntig ab zwei z'Midaag.